

Ivittuut Kangilinnguillu eqqaanni nunap allanngutsaaliorneqarnissaa pillugu Namminersorlutik Oqartussat nalunaarutaat nr. 4, apriliip 12-ani 2010-meersoq

Pinngortitamik allanngutsaaliuineq pillugu Inatsisartut inatsisaanni nr. 29-mi decembarip 18-ani 2003-meersumi § 5, imm. 1, nr. 1, nr. 4, nr. 8 aamma 9, § 9-mi nr. 1 aamma nr. 2, § 16 imm. 1, § 19, § 20, § 46, aamma § 60, imm. 2 aamma imm. 4 naapertorlugit makku aalajangersarneqarput:

Siunertat killiliinerillu

§ 1. Ivittuut Kangilinnguillu eqqaani nuna sanaartorfiusup avataniittoq allanngutsaaliugassanngortinneqarpoq pinngortitap pilersitaasa nunamilu eriagisassat, kulturikkullu oqaluttuarisaanermi takussutissat pigiinnarneqarnissaat siunertaralugu kiisalu nunap tamatuma nungullarsarneqannginnissaa illersorniarlugu, tamatumunnga ilanngullugit Ikkap kangerluani napasuliaasat Ikait-it. Eqqissisimatitsineq aammattaaq nunap tamatuma piujuaannartitsisumik atorneqarnissaanut aammalu pisuussutitut uumassusilinnut kiisalu Qoornup eqqaani qasigiaqarnerata illersorneqarnissaanut iluaqutaassaaq.

Imm. 2. Nalunaarut aatsitassanik misissueqqaarnermut, misissueqqissaarnermut piiaanermullu atatillugu suliniutinut atuutinngilaq. Pinngortitap illersornissaanut malittarisassat kiisalu atortulersuutinik inissiineq il.il. malittarisassat inatsisikkut, suliniutissanut taamaattunut piginnaatitaanermik aningaasaliissuteqarnermilluunniit nalunaaruteqarnermut tunngavigineqartukkut, kiisalu taakkua oqartussaasunit tamakkiisumik suliarineqarnerannut ilanngunneqartunit, aalajangersarneqassapput.

§ 2. Sumiiffik allanngutsaaligaq ilanngussami 1-imi nalunaarneqarpoq.

Imm. 2. Illoqarfiup killinga tikillugu eqqissisimatitsivittut killiliussami illoqarfiup nalunaarutip matuma atuutilerfiata nalaani killinga malinneqassaaq, takuuk ilanngussaq 1.

Imm. 3. Sumiiffiup allanngutsaaliukkap iluani nunap immikkoortuisa ilai tallimaasut toqqarneqarput, takuuk ilanngussaq 2.

1) Sumiiffiup ilaa A tassaavoq Ikka Ikkap nerukinnerata avannaaniittoq.

2) Sumiiffiup ilaa B tassaavoq Qoornup Kujalliup Sermiata kujammut killepiala aamma Qoornup Avannarliup Sermia, Atarnup Tasia kiisalu taseq tamatuma kujatinnguaniittoq.

3) Sumiiffiup ilaa C tassaavoq nuuk Qaamasunnguup sioraaniittoq (titarnerup narlusuup 61°10'49,89"N; 47°48'14,10"W-ip aamma 61°10'58,64"N; 47°47'25,09"W-ip akornaniittoq)..

4) Sumiiffiup ilaa D tassaavoq Eqaluit eqqaat titarnerup narlusuup Eqaluit Qeqertaani nuullu Eqaluit Qeqertaata kujatinnguaniittup akornaniittoq.

5) Sumiiffiup ilaa E tassaavoq Ilorpup killeqarfiup ilaa timmissat ineqarfiannit 1000 meterisut ungasitsigisoq.

Imm. 4 Nunap aqquisa kalaallisut qallunaatullu taaguutaat ilanngussaq 3-miipput.

Nalinginnaasumik tikinneqarsinnaanera atorneqarneralu

§ 3. Sumiiffik eqqissisimatitap kikkunnilluunniit tikinneqarsinnaavoq killiliussatigut nalunaarummut matumunnga malinnaatinneqartutigut.

§ 4. Sumiiffiup eqqissisimatitap iluani tatsit, kuuit, kangerluit nunalluunniit eqqakkanik pinngortitamit pisuunngitsunik, aalisarnermut atortunik atornikunik kiisalu nalunaaqutsersuutunik atorunnaarsimasunik ilisimatusarnermulluunniit atortunik qanorluunniit ittunik mingutsinneqarnissaat inerteqqutaavoq.

Imm. 2. Orkidét assaavigineqarnissaat, orpiit ajoquserneqarnissaat naasulluunniit arlaatigut ajoquserneqarnissaat nunalluunniit allanngortinneqarnissaa inerteqqutaapput.

§ 5. Sumiiffiup allanngutsaaliukkap iluani nunalerinikkut suliniutit, uumasuuteqarneq, naggorissaaneq imaluunniit naasunik piiaaneq inerteqqutaapput.

§ 6. Sumiiffiup ilaani A-mi napasuliaasanik ikait-inik nungusaaneq tamarmi, takuuk ilanngussaq 2, tassunga ilanngullugu napasuliaasanit ikait-init atortussianik imaluunniit taakkuninnga immap naqqani sumi tamaaniittunik katersuineq nammineerlunilu piiaaneq inerteqqutaapput.

Tuperneq innermillu maaniinnaq ikumatitsineq

§ 7. Sumiiffiup allanngutsaaliukkap iluani tuperneq aamma innermik maaniinnaq ikumatitsineq, tassunga ilanngullugu gassimik sprittimilluunniit kissaassutunik il.il. atuneq taamaallaat nunami tamaani ullut unnuallu tallimat tikillugit pisinnaapput. Tamatuma saniatigut tuperneq innermillu maaniinnaq ikumatitsineq, tassunga ilanngullugu gassimik sprittimilluunniit kissaassutunik assigisaannillu atuneq, tamatuma kingorna sumiiffimmi allami, sumiiffigisimasamiit minnerpaamik 100 meterinik ungasissusilimmi taamaallaat pisinnaavoq, taamaattoq takuuk imm. 2.

Imm. 2. Nunaminertat aalajangersimasumik tupersimaatarfiit innermillu maaniinnaq ikumatitsiviusartut, tassunga ilanngullugu gassimik sprittimilluunniit kissaassutunik il.il. ullunik unnuanillu tallimanik sivilunerusumik atuneq Kommuneqarfik Sermersuumit kommunip ileqqoreqqusaatigut, Nunami Namminermut, Pinngortitamut Avatangiisinullu Naalakkersuisoqarfimmit atuutilersinneqartutigut, toqqarneqarsinnaapput. Nunap ilaani tamaani sumiiffiit, tuperfigineqarsinnaasut innermillu maaniinnaq ikumatitsiviusinnaasut, tassunga ilanngullugit gassimik sprittimilluunniit kissaassutunik il.il. ullunit unnuanillu tallimanit sivilunerusumik atuiffiusarsinnaasut, erseqqissumik nalunaarneqassapput.

Imm. 3. Sumiiffiup allanngutsaaliukkap iluani naasut toqunerit kiisalu qissiat qisussatut katersorneqarsinnaallutillu ikummatigineqarsinnaapput.

Sanaartorneq, atortulersuutit pisummillu angalaarluni aqquitit

§ 8. Sumiiffiup allanngutsaaliukkap iluani illuutunik atortulersuutinilluunniit allanik sanaartorneq

kiisalu aqqusinniorneq aqqusinneeraliornerluunniit inerteqqutaavoq, taamaattoq takuuk imm. 2.

Imm. 2. Nunami Namminermut, Pinngortitamut Avatangiisinullu Naalackersuisoqarfiup Kommuneqarfik Sermersooq tusarniaavigereerlugu illuutitik sananissamut imaluunniit atortulersuutitut aalajangersimasunut kiisalu aqqusinniornissamut aqqusineeraliornissamullu akuersissuteqarsinnaavoq.

Imm. 3. Nunami Namminermut, Pinngortitamut Avatangiisinullu Naalackersuisoqarfik illuutit atortulersuutilluunniit aalajangersimasut allat annertussusissaannut, suussusissaannut, inissinneqarnissaannut, ilusissaannut, portussusissaannut kiisalu imm. 2-mi akuersissutini tunniunneqartuni nunap naasullu pissuserisimasaattut isikkoqalerseqqinnissaannut atugassarititanik aalajangersaasinnaavoq.

§ 9. Pisummik angalaarluni aqquutit Nunami Namminermut, Pinngortitamut Avatangiisinullu Naalackersuisoqarfimmit tusarniaaereenikkut Kommuneqarfik Sermersuup innersuussineratigut nalunaaqutsersorneqarsinnaapput.

Nunakkut imaatigullu angalaneq

§ 10. Sumiiffiup allanngutsaaliukkap iluani cykelinik kiisalu qamutitik motorilinnik angalaneq inerteqqutaavoq.

Imm. 2. Imm. 1-imi inerteqquteqarnermi pineqanngillat nunami qerisumi aputilimmilu qamuterallannik angalaneq kiisalu annaassiniarnernut, piniarnermik nakkutilliisut sulinerannut aamma Kalaallit Nunaanni Sakkutooqarfiup annaassiniartartuisa suliaannut atasumik angalanerit.

Imm. 3. Imm. 1-imi inerteqquteqarnermi pineqanngilaq Kangilinnguit aamma Jernhattenimi Grønnealdshyttenillu akornanni qamutit illernisigut cykelinik kiisalu qamutitik motorilinnik angalaneq.

§ 11. Nunami, natorallit, kiinaaleeqqat kissaviarsuillu inaannut 500 meterinit qaninnerusumik, angalaarneq piffissami apriliip 1-aniit aggustip 15-anut inerteqqutaavoq.

§ 12. Sumiiffimmi allanngutsaaliukkami nunap ilaani C-mi, takuuk ilanngussaq 2, angallatinik motorilinnik imaani angalaarneq inerteqqutaavoq.

Imm. 2. Nunap ilaani E-mi, takuuk ilanngussaq 2, angallatinik motorilinnik angalaarneq piffissami juunip 1-aniit septembarip 1-anut inerteqqutaavoq.

Imm. 3. Imm. 1-imi 2-milu inerteqquteqarnermi pineqanngillat annaassiniarnernut, piniarnermik nakkutilliisut sulinerannut aamma Kalaallit Nunaanni Sakkutooqarfiup annaassiniartartuisa suliaannut kiisalu ilisimatuut misissuinerannut atasumik angallatinik motorilinnik imaani angalaarneq.

§ 13. Sumiiffiup ilaani A-mi, takuuk ilanngussaq 2, 3 knobinik sukkanerusumik angalaarneq inerteqqutaavoq, angallatillu 50 centimeterit sinnerlugit itsineqassanngilaq. Ikait-it ersiinnartut eqqaanni 50 meterit iluanni imaatigut angalaarnermi taamaallaat umiatsiaaqqat, qaannat assigisaalluunniit motooreqanngitsut atorneqarsinnaapput.

Imm. 2. Sumiiffiup ilaata A-p iluani imaatigut angalaarnissaq siumoortumik Kommuneqarfik Sermersuup ataani Ivittuuni Innuttaasunik Sullissivimmuut siumoortumik nalunaarutigineqassaaq.

Timmisartornerit

§ 14. Nunami tamaani uumasut mianereqqullugit nuna allanngutsaaliukkami nunap qulaatigut 500 meterinit appasinnerusumik timmisartorneq kiisalu nuna allanngutsaaliukkami timmisartumik minneq inerteqqutaapput.

Imm. 2. Imm. 1-imi inerteqquneqarnermi pineqanngillat akuerisaasumik timmisartuussisarnernut, annaassiniarnernut ujaasinernullu, Kalaallit Nunaanni Sakkutooqarfiup suliaanut kiisalu eqqissisimatitsiviusumi ilisimatuutut siunertalinnut atatillugu timmisartornissaq minnissarlu.

Aalisarnej piniarnerlu

§ 15. Aalisarnermut, Piniarnermut Nunalerinermullu Naalackersuisoqarfik umimmattassatut pisassiissutinik umimmannillu tammajuitsussarsiniarluni piniarnermut aalajangersaasinnaavoq.

§ 16. Sumiiffiup ilaani B-mi C-milu puisinniarnej tamarmi inerteqqutaavoq, takuuk ilanngussaq 2.

§ 17. Qassusersorneq, tassunga ilanngullugu bundgarnersorneq, sumiiffiup ilaani A-mi, B-mi, C-mi D-milu inerteqqutaavoq, takuuk ilanngussaq 2.

Imm. 2. Sumiiffiup ilaani A-mi sissamiit aalisarnej taamaallaat inerteqqutaanngilaq.

§ 18. Sumiiffimmi allanngutsaaliukkami imermi tarajuunngitsumi qissattaammik eqalunniarnej taamaallaat akuerisaavoq.

Imm. 2. Aalisakkat imermi tarajuunngitsumi pisat perlukui nunamut qimanneqassapput.

Aqutsineq, nakkutilliineq immikkullu akuersissuteqarnej

§ 19. Nunami Namminermt, Pinngortitamut Avatangiisinullu Naalackersuisoqarfiup Kommuneqarfik Sermersuumik tusarniaarernikkut nuna allanngutsaaliukkamut aqutsinikkut pilersaarut suliarisinnaavaa.

§ 20. Kommuneqarfik Sermersuumi kommunalbestyrelsip nalunaarut manna maleruarneqarnerseq nakkutigissavaa.

§ 21. Nunamut Namminermt, Pinngortitamut Avatangiisinullu Naalackersuisoqarfik Kommuneqarfik Sermersuumi kommunalbestyrelsimik tusarniaareernikkut § 6-imit, § 7-imi imm. 1-imit, § 10-mi, imm. 1-imit, § 11-mit kiisalu § 14-imi imm. 1-imit immikkut akuersissuteqarnermik nalunaaruteqarsinnaavoq.

§ 22. §§ 4-6-imit, § 7-imi, imm. 1-imit, § 8-mi, imm. 1-imit, § 10-mi, imm. 1-imit, § 11-mik, § 12-imi, imm. 1-imit 2-millu, § 13-imit, § 14-imi, imm. 1-imit, §§ 16-17-imit kiisalu § 18-imi, imm. 1-imit unioqquitsineq akiliisitaanermik kinguneqarsinnaavoq.
Imm. 2. Atugassarititanik § 8, imm. 3 naapertorlugu aalajangersakkanik unioqquitsineq akiliisitaanermik kinguneqarsinnaavoq.

Imm. 3. Suliffeqarfimmit, tamakkiisumik ilaannakortumilluunniit Naalagaaffimmit, Namminersorlutik Oqartussanit, kommunimit imaluunniit kommuninit ataatsimoortumik ingerlatseqatigiiffimmit, piginneqatigiiffimmit, piginneqataassuteqarluni piginneqatigiiffimmit assigisaannilluunniit pigineqartumit unioqqutitsinermit pineqartoq pinerluttulerinermut inatsit malillugu akisussaatinneqassaaq. Taamattaq atuutissaaq Namminersorlutik Oqartussat, kommunit imaluunniit kommunit ataatsimoortut unioqqutitsisimappata.

Imm. 4. Imm. 1-3 malillugit akiliisitsissutit Nunatta Karsianut nakkartinneqassapput.

§ 23. Nalunaarut juunip 1-ani 2010-mi atuutilerpoq.

Imm. 2. Tamatumunnga peqatigitillugu Ikkap kangerluata iluani qinnguata eqqissisimatitaanissaa pillugu Namminersornerullutik Oqartussat nalunaarutaat nr. 11, apriliip 25-ani 2000-imeersoq atorunnaarsinneqarpoq.

Namminersorlutik Oqartussat, ulloq apriliip 12-at 2010

Anthon Frederiksen

/

Hans-Erik Bresson